

Ging-sou Dongh Mouz Laanh Giduc Mienh Horpc Zuqc Hiuv Caux Jangx

NJOUX EN KUNGX YIEM YESU HNANGV:

1. **1 Ti[^]mo[^]tai 2:5-6** "Weic zuqc maaih nduqc dauh Tin-Hungh hnangv. Yaac maaih nduqc dauh yiem Tin-Hungh caux mienh mbu'ndongx zoux mbu'ndongx mienh, se Giduc Yesu, dongh benx baamh mienh wuov dauh. Giduc Yesu siev ninh ganh nyei maengc weic zuoqc maanc mienh nzuonx. Taux horpc nyei ziangh hoc ninh hnangv naaiv nor zoux bun cing Tin-Hungh oix maanc mienh duqv njoux"
2. **Gong-zoh 4:12** "Cuotv liuz Yesu, maiv maaih haaix dauh haih bun mienh duqv njoux, weic zuqc yiem lungh ndiev maanc mienh mbu'ndongx, Tin-Hungh maiv ceix ganh norm mbuox, bun mbuo oix zuqc kaux duqv njoux."
3. **Yo[^]han 14:6** Yesu dau, "Yie se dongh mingh Zaangc Diex wuov diuh jauv, yaac dongh zien leiz, yaac dongh ziangh maengc. Cuotv liuz kaux yie, maiv maaih haaix dauh haih mingh duqv taux Zaangc Diex wuov

OIX ZUQC GOIV HNYOUV GUANGC ZUIZ:

1. **Lugaa 13:3** "Maiv zeiz lorqc. Yie mbuox meih mbuo, se gorngv meih mbuo maiv goiv hnyouv guangc zuiz, meih mbuo yaac fih hnangv nyei oix zuqc mietc"
2. **Gong-zoh 3:19** Weic naaiv, meih mbuo oix zuqc goiv hnyouv nzuonx daaih lorz Tin-Hungh, bun ninh sortv guangc meih mbuo nyei zuiz. Ziouv ziouc bun meih mbuo nyei hnyouv maaih ziangh hoc nyiemz, fingv jiez daaih
3. **Gong-zoh 8:22** Meih oix zuqc goiv hnyouv guangc nzengc naaiv nyungc waaic haic nyei za'eix. Meih yiem hnyouv hnamv cuotv naaiv deix waaic sic mv baac meih oix zuqc daux gaux tov, nziex Ziouv haih guangc nqoi bun meih mv bei

4. **Gong-zoh 26:20** Yie ziouc yiem Ndaa^matv^gatc Zingh zunh doz ndaangc, nqa'haav mingh Ye^lu^saa^lem Zingh, aengx mingh gormx l^saa^laa^en Deic-Bung, aengx cuotv mingh Janx nyei dorngx zunh doz bun zuangx mienh hiuv duqv ninh mbuo oix zuqc goiv hnyouv guangc zuiz nzuonx daaih lorz Tin-Hungh yaac zoux sic bun cing ninh mbuo za'gengh goiv hnyouv guangc zuiz mi'aqv

OIX ZUQC ZIPV YESU ZOUX ZIOUV:

1. **Yo^han 1:12** "Mv baac zipv ninh yaac sienx kaux ninh wuov deix, ninh bun maaih leiz benx Tin-Hungh nyei naamh nyouz"
2. **Yo^han 3:36** Haaix dauh sienx kaux Tin-Hungh nyei Dorn, wuov dauh maaih yietc liuz nyei maengc. Mv baac haaix dauh maiv muangx Tin-Hungh nyei Dorn nyei waac nor, maiv haih duqv yietc liuz nyei maengc yaac zuqc Tin-Hungh dingc jienv ninh nyei zuiz."
3. **Yo^han 3:16** "Tin-Hungh ndongc naaic hnamv lung h ndiev mienh cingx zorqv ninh nyei ndoqc Dorn ceix bun ninh mbuo. Haaix dauh sienx kaux Tin-Hungh nyei Dorn maiv zuqc mietc mv baac duqv yietc liuz nyei maengc"

YESU DAIC WEIC MBUO:

1. **Yo^han 3:16** "Tin-Hungh ndongc naaic hnamv lung h ndiev mienh cingx zorqv ninh nyei ndoqc Dorn ceix bun ninh mbuo. Haaix dauh sienx kaux Tin-Hungh nyei Dorn maiv zuqc mietc mv baac duqv yietc liuz nyei maengc"
2. **Lomaa 5:8** "Mv baac Tin-Hungh bun cing ninh ndongc haaix hnamv mbuo. Dongh mbuo corc zoux zuiz-mienh nyei ziangh hoc Giduc weic mbuo daic"
3. **1 Ko^lin^to 15:3** "Yie ganh zipv daaih nyei yie zunh mbuox meih mbuo mi'aqv. Gauh longc jienv jiex nyei se hnavg Ging-Sou fiev jienv gorngv nor, Giduc weic mbuo nyei zuiz daic"
4. **1 Bide 3:18** Giduc weic zuiz daic yietc nzunc dorngx yietc liuz. Yietc laanh maiv maaih zuiz nyei mienh div zuangx zuiz-mienh

daic weic dorh mbuo taux Tin-Hungh. Giduc nyei sin zuqc daix daic mv baac Singx Lingh bun ninh aengx nangh daic.

MAIV HAIH NDORTV NJOUX EN:

1. **Yo^han 10:27-28** Yie nyei ba'gi yungh muangx yie nyei qiex. Yie yaac hiuv duqv ninh mbuo, ninh mbuo yaac gan jienv yie mingh. Yie bun ninh mbuo maaih yietc liuz nyei maengc, yietc liuz maiv zuqc daic. Ninh mbuo yiem yie nyei buoz, maiv maaih haaix dauh haih caangv duqv cuotv
2. **Fi^lipv^poi 1:6** Yie sienx dingc Tin-Hungh yiem meih mbuo nyei hnyouv jiez gorn zoux kuv gong, yaac oix zoux jienv mingh taux Giduc Yesu aengx daaih nyei hnoi ziouc zoux ziangx nzengc aqv
3. **1 Yo^han 5:11-12** Tin-Hungh zoux zornz-zengx se dongh naaiv. Tin-Hungh bun mbuo duqv yietc liuz nyei maengc. Naaiv nyungc maengc se yiem ninh nyei Dorn daaih. Haaix dauh maaih Tin-Hungh nyei Dorn, wuov dauh ziouc maaih ziangh maengc. Haaix dauh maiv maaih Tin-Hungh nyei Dorn, wuov dauh maiv maaih ziangh maengc aqv.

OIX ZUQC ZIANGH JIENV ZIOUV:

1. **Yo^han 15:5** “Yie se a'ngunc hmei. Meih mbuo se a'ngunc nquaah. Haaix dauh ziangh jienv yie, yie yaac ziangh jienv ninh, wuov dauh ziouc ziangh biouv gitv aqv. Meih mbuo leih nqoi yie nor, meih mbuo maiv haih zoux haaix nyungc
2. **Yo^han 15:6** Haaix dauh maiv ziangh jienv yie, ziouc hhangv diuh hmei-nquaah zuqc pitv guangc, nqaai mingh yaac zuqc nzauz daaih dapv douz-nzauz buov guangc mingh.

ZUIZ/ZUIZ NYEI GORN:

1. **Lomaa 3:10** Hhangv Ging-Sou fiev jienv gorngv, “Maiv maaih haaix dauh caux Tin-Hungh horpc hnyouv, yietc dauh yaac maiv maaih.

2. **Lomaa 3:23** weic zuqc mouz laanh mienh zungv baamz zuiz, leih duqv Tin-Hungh nyei njang-laangc go
3. **Lomaa 5:12** Laaix nduqc laanh mienh baamz zuiz, zuiz bieqc baamh gen. Weic naaiv zuqc daic nyei qaqv linh jienv mingh bun maanc mienh zuqc daic weic zuqc dauh dauh mienh baamz zuiz

MAIV ZEIZ WEIC MBUO ZOUX NYEI DUQV NJOUX:

1. **Lomaa 4:4-5** Mienh zoux gong duqv gong-zinh. Ninh nyei gong-zinh maiv funx zoux zingh nyeic, se ninh ganh bietv daaih nyei hngv. Haaix dauh maiv kaux ganh zoux nyei sic mv baac sienx kaux Tin-Hungh, dongh bun zuiz-mienh caux ninh horpc hnyouv wuov dauh, weic ninh sienx, Tin-Hungh ziouc funx wuov dauh caux ninh horpc hnyouv mi'aqv
2. **E^fe^so 2:8-9** Meih mbuo duqv njoux se weic Tin-Hungh nyei en, weic zuqc meih mbuo sienx kaux ninh. Se maiv zeiz meih mbuo ganh zoux nyei, se Tin-Hungh ceix bun nyei zingh nyeic. Mienh duqv njoux se maiv zeiz kaux ganh zoux nyei sic, weic maiv bun haaix dauh haih bungx waac-maux
3. **Tidatc 3:5** ninh njoux mbuo. Se maiv zeiz weic mbuo zoux nyei haaix nyungc kuv sic, se weic Tin-Hungh ganh korv-lienh mbuo. Ninh longc Singx Lingh nzaaux mbuo, bun mbuo siang-yungz jhex

TIN-HUNGH DORH MIENH ZOC NINH NYEI WAAC:

1. **2 Timothy 3:16-17** Douc-douc Ging-Sou, Tin-Hungh dorh mienh fiev yaac maaih lamh longc weic njaaux mienh, weic gorngv-hemx mienh, weic zorc mienh zoux dorngc nyei dorngx, weic njaaux mienh zoux horpc nyei jauv. 17 Hngv naaic ziouc bun Tin-Hungh nyei mienh duqv dunh yunh nzoih weic zoux nyungc-nyungc kuv sic
2. **2 Bide 1:12** Weic zuqc maiv maaih haaix dauh haih ei ganh nyei eix douc Tin-Hungh nyei waac. Mienh douc Tin-Hungh nyei waac se ei Singx Lingh dorh ninh mbuo gorngv hngv.

ZIOUV NYEI WAAC MBUO OIX ZUQC HAIZ:

1. **Lomaa 10:17** Hnangv naaic, mienh sienx weic zuqc ninh mbuo haiz Giduc nyei doz. Ninh mbuo duqv haiz weic zuqc maaih mienh mingh zunh bun ninh mbuo muangx
2. **Cong-mengh 1:5** weic bun cong-mengh mienh muangx yaac haih jaa hoqc hiuv camv, bieqc hnyouv nyei mienh yaac haih maaih banh zeic,

ZIOUV NYEI WAAC MBUO OIX ZUQC HOQC:

1. **2 Ti^mo^tai 2:15** Meih oix zuqc njiec qaqv zoux nyungc-nyungc weic bun Tin-Hungh horpc hnyouv, ziouc zoux maiv zuqc nyaiv nyei gong-mienh, yaac longc duqv horpc Tin-Hungh zien leiz nyei doz
2. **Matv^tai 11:29** Zorqv yie nyei ndiangx-gaaz gaaz jienv, zuotc yie nyei nyungc, weic zuqc yie hnyouv suonc, horh norh, meih mbuo ziouc duqv baengh orn

ZIOUV NYEI WAAC MBUO OIX ZUQC EI:

1. **Yaagorpc 1:22** Maiv dungx nduov ganh laaic haiz liuz doz ziouc gaux aqv. Daaux nzuonx oix zuqc ei jienv zoux.
2. **Yaagorpc 4:17** Hnangv naaic, haaix dauh hiuv duqv ninh horpc zuqc zoux haaix nyungc kuv sic, ninh yaac maiv zoux, wuov dauh ziouc maaih zuiz aqv

ZIOUV NYEI WAAC MBUO OIX ZUQC DOQC:

1. **Lauc Yaangh 1:3** Doqc naaiv buonv sou nyei mienh maaih orn-lorqc aqv. Muangx haiz naaiv deix douc daaih nyei waac yaac ei jienv zoux nyei mienh yaac maaih orn-lorqc, weic zuqc naaiv deix sic oix cuotv nyei ziangh hoc taux fatv aqv
2. **Yo^su^waa 8:35** Mose hatc nyei yietc zungv waac maiv maaih yietc joux Yo^su^waa maiv dornj jienv doqc bun yietc zunv gapv zunv nyei l^saa^laa^en Mienh, liemh m'sieqv dorn caux fu'jueiv

aengx caux yiem ninh mbuo mbu'ndongx nyei ganh fingx mienh muangx.

ZIOUV NYEI WAAC MBUO OIX ZUQC ZIU YIEX FEI-FANGV:

1. **Yo[^]su[^]waa 1:8** Maiv dungx la'kuqv zanc-zanc doqc naaiv buonv Leiz-Latc Sou. Ndorm-ndorm muonz-muonz oix zuqc fei-fangv, weic bun meih faix fim ei jienv sou fiev nyei yietc zungv waac. Hnangv naaic meih zoux nyei nyungc-nyungc ziouc zoux duqv longx yaac zoux duqv dunh yunh
2. **Singx Nzung 1:2** Daaux nzuonx ninh a'hneiv Ziouv nyei leiz-latc, ziu yiex fei-fangv ninh nyei leiz.
3. **1 Ti[^]mo[^]tai 4:15** Naaiv deix javv oix zuqc liepc fiem liepc eix jorm hnyouv zoux, weic bun zuangx mienh buatc meih bieqc bouc

ZIOUV NYEI WAAC MBUO OIX ZUQC JANGX:

1. **Singx Nzung 119:9-11** Houh saeng mienh oix zuqc hnangv haaix nor goux duqv ninh ganh nyei javv cing-nzengc? Se oix zuqc ei jienv meih nyei waac zoux. 10 Yie longc nzengc hnyouv lorz meih. Tov bun yie maiv dungx leih nqoi meih nyei lingc. 11 Yie zorqv meih nyei waac zaangh jienv yie nyei hnyouv, weic bun yie maiv baamz zuiz dorngc meih
2. **Yo[^]han 15:20** Meih mbuo oix zuqc jangx jienv yie mbuox jiex meih mbuo naaiv deix waac, 'Bou maiv gauh hlo ziouv.

HNOI-HNOI NYIEMC ZUIZ:

1. **Singx Nzung 38:18** Yie nyiemc yie nyei zuiz, yie weic yie nyei zuiz nzauh.
2. **Cong-mengh 28:13** Haaix dauh buang jienv ninh ganh nyei zuiz maiv haih duqv longx, mv baac haaix dauh nyiemc ganh zoux dorngc nyei zuiz aengx guangc nqoi, ziouc duqv Tin-Hungx korv-lienh.

3. **1 Yo^han 1:9** Se gorngv mbuo nyiemc mbuo nyei zuiz, Tin-Hungh se ziepc zuoqv nyei, baengh fim nyei, ziouc guangc mbuo nyei zuiz caux mbuo zoux nyei yietc zungv waaic sic, fioux mbuo cing-nzengc daaih

DAUX GAUX:

1. **Matv^tai 21:22** Se gorngv meih mbuo sienx, maiv gunv meih mbuo daux gaux tov haaix nyungc, meih mbuo ziouc duqv aqv.”
2. **Fi^lipv^poi 4:6-7** Maiv dungx weic haaix nyungc guaax hnyouv. Oix zuqc weic nyungc-nyungc sic daux gaux jough Tin-Hungh, laengz zingh Tin-Hungh, ei meih mbuo qiemx longc nyei tov ninh tengx. 7 Tin-Hungh nyei baengh orn, dongh baamh mienh zungv hnamv maiv zaaic nyei baengh orn, ziouc beu jienv meih mbuo nyei hnyouv caux hnamv nyei jauv, weic zuqc meih mbuo caux Giduc Yesu juangc maengc ziangh.
3. **1 Yo^han 3:22** Mbuo yaac hiuv duqv mbuo tengx ninh tov haaix nyungc, ziouc duqv wuov nyungc aqv, weic zuqc mbuo ei jienv ninh nyei lingc zoux, yaac zoux horpc ninh nyei hnyouv.
4. **Yaagorpc 5:16** Hnangv naaic, meih mbuo laanh oix zuqc nyiemc zuiz bun laanh, laanh oix zuqc tengx laanh daux gaux. Meih mbuo nyei baengc ziouc longx mi'aqv. Kuv mienh daux gaux, ninh daux gaux nyei waac maaih qaqv yaac lingh haic

Maaih camv yiemc Ging-sou dongh Giduc mienh oix zuqc hiuv oix zuqc jangx jienv yiem hnyouv. Naaiv deix se benx jiex gorn nyei hnangv. Tov Tin-Hungh bun mbuo maaih hnyouv jangx, maaih cong-mengh haih dorh Ninh nyei waac daaih zanx jienv mbuo nyei hnyouv, daaih longc yiem mbuo nyei maengc.

©Yauzsing 2015

Longc Nzung/Lyric, Zunh doz qiex/Audio, Fangx Naangh/Video, Zoc Nyei Sou/Writing, caux Fangx Linh/Power Point nyei leiz/policy:

Gunv zorqv mingh longc caux aamx cuotv duqv weic juangc jienv bun Ziouv nyei kuv fienv gormx lung h ndiev. Mv baac tov:

1. Oix zuqc aamx cuotv nzengc, maiv dungx gatv (edit-tipv fai zorqv cuotv) zunh doz nyei waac fai fiev nyei sou fai nzung nyei waac.
2. Nzung nyei waac caux qiex maiv dungx dorh daaih baaux weic maaic nyaanh, Sou maiv haih longc nyaanh, maiv gunv meih ganh ndortv aamx nyei zinh.
3. Maiv haih zorqv zunh nyei doz fai fiev nyei sou aan meih nyei website, kungx haih kuangx/link hngangv cuotv liuz mbuox ndangc.
4. **Tov maiv dungx yienc fai pienx Ging-sou fai Yauzsing gorngv nyei eix-leiz weic maiv oix pien caux pienx Ziouv nyei waac.**
5. Tov tengx jienv zorc oc. Laengz zingh mienh muoz. A'hneiv duqv juangc jienv bun Ziouv nyei kuv fienv haih gormx lung h ndiev.

